

枯樹賦 (庾信)

殷仲文風流儒雅，海內知名。世異時移，出為東陽太守，常忽忽不樂，顧庭槐而嘆曰：「此樹婆娑，生意盡矣。」

至於白鹿貞松，青牛文梓，根柢盤魄，山崖表裡。桂何事而銷亡，桐何為而半死？昔之三河徙植，九畹移根，開花建始之殿，落實睢陽之園。聲含嶰谷，曲抱《雲門》。將雛集鳳，比翼巢鴛。臨風亭而唳鶴，對月峽而吟猿。

乃有拳曲擁腫，盤坳反覆。熊彪顧盼，魚龍起伏。節豎山連，文橫水蹙。匠石驚視，公輸眩目。雕鏤始就，斲削仍加。平鱗鏟甲，落角摧芽。重重碎錦，片片真花，紛批草樹，散亂煙霞。

若夫松子、古度、平仲、君遷，森梢百頃，槎枿千年。秦則大夫受職，漢則將軍坐焉。莫不苔埋菌壓，鳥剝蟲穿。或低垂於霜露，或撼頓於風煙。東海有白木之廟，西河有枯桑之社，北陸以楊葉為關，南陵以梅根做冶。小山則叢桂留人，扶風則長松系馬。豈獨城臨細柳之上，塞落桃林之下？

若乃山河阻絕，飄零離別。拔本垂淚，傷根瀝血。火入空心，膏流斷節。橫洞口而鼓卧，頓山腰而半折。文斜者百圍冰碎，理正者千尋瓦裂。載瘦銜瘤，藏穿抱穴。木魅閃睒，山精妖孽。

況復風雲不感，羈旅無歸，未能采葛，還成食薇。沉淪窮巷，蕪沒荆扉。既傷搖落，彌嗟變衰。《淮南子》雲：「木葉落，長年悲。」斯之謂矣。

乃歌曰：「建章三月火，黃河萬里槎。若非金谷滿園樹，即是河陽一縣花。」桓大司馬聞而嘆曰：「昔年種柳，依依漢南。今看搖落，淒愴江潭。樹猶如此，人何以堪！」